

Bil. 42

Selasa

1 Disember 2020



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KETIGA
MESYUARAT KETIGA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Peruntukan RM50 Juta Bagi Penyelenggaraan
SJKT**
- *YB. Tuan Sivakumar Varatharaju Naidu*
 (Batu Gajah) (Halaman 1)
- **Ketiadaan Bekalan Asas Utiliti di
Kampung Tersusun Murni Jaya, Kulai**
- *YB. Puan Teo Nie Ching (Kulai)* (Halaman 4)

**MALAYSIA
KAMAR KHAS
PARLIMEN KEEMPAT BELAS
PENGKAL KETIGA
MESYUARAT KETIGA**

Selasa, 1 Disember 2020

Mesyuarat dimulakan pada pukul 12.00 tengah hari

DOA

*[Tuan Yang di-Pertua **mempengerusikan Mesyuarat**]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Peruntukan RM50 Juta Bagi Penyelenggaraan SJKT

12.04 tgh.

Tuan Sivakumar Varatharaju Naidu [Batu Gajah]: Terima kasih Tuan Yang di-Pertua. Terima kasih juga diucapkan kepada Yang Berhormat Timbalan Menteri Pendidikan kerana sudi datang menjawab soalan saya berkaitan dengan peruntukan RM50 juta bagi penyelenggaraan SJKT.

Tuan Yang di-Pertua, kerajaan memperuntukkan RM50 juta dalam Belanjawan 2020. Wang peruntukan ini adalah bertujuan untuk membiayai kos penyelenggaraan. Setiap tahun dana ini tidak digunakan sepenuhnya untuk penyelenggaraan sekolah-sekolah Tamil. Terdapat banyak birokrasi yang dijadikan alasan oleh kementerian berkaitan dengan hal ini.

Pada pandangan saya, jumlah peruntukan yang disediakan oleh kerajaan adalah tidak penting. Yang lebih penting adalah kemampuan untuk membelanjakan peruntukan tersebut bagi tahun yang sama. Di sini saya ingin mengemukakan beberapa persoalan berkaitan dengan peruntukan RM50 juta untuk SJKT.

- (i) Berapakah jumlah yang telah dibelanjakan untuk tujuan penyelenggaraan SJKT sehingga bulan Oktober 2020?;
- (ii) Bolehkah dana penyelenggaraan ini diguna pakai untuk membeli peralatan-peralatan audio visual dan perbelanjaan ICT di sekolah-sekolah yang memerlukan?;
- (iii) Apakah cadangan Kementerian Pendidikan untuk membelanjakan wang baki yang masih belum dibelanjakan setakat ini?;

- (iv) Adakah kerajaan akan mengeluarkan peruntukan dana RM50 juta bagi tahun 2021 bagi tujuan penyelenggaraan SJKT?; dan
- (v) Apakah mekanisme atau cadangan yang lebih mantap dalam membelanjakan RM50 juta supaya jumlah wang besar itu tidak dibazirkan dalam hal-hal yang tidak membantu proses pembelajaran dan pengajaran?

Sekian, terima kasih.

12.06 tgh.

Timbalan Menteri Pendidikan II [Tuan Muslimin bin Yahaya]:

Bismillahi Rahmani Rahim. Assalamualaikum warahmatullahi wabarakatuh.

Salam sejahtera dan selamat tengah hari. Terima kasih Tuan Yang di-Pertua dan terima kasih Yang Berhormat Batu Gajah.

Kementerian Pendidikan Malaysia (KPM) sentiasa berusaha untuk menyediakan kemudahan dan fasiliti yang lengkap kepada semua sekolah tanpa mengira aliran bagi menyediakan suasana pembelajaran yang kondusif kepada semua murid termasuk sekolah jenis kebangsaan Tamil (SJKT). Peruntukan-peruntukan yang disalurkan ini adalah untuk menampung kos bagi kerja-kerja penyelenggaraan kecil bangunan sekolah dan infrastruktur sekolah.

Bagi soalan yang dikemukakan oleh Yang Berhormat tadi, berapakah jumlah yang telah dibelanjakan untuk tujuan penyelenggaraan SJKT sehingga bulan Oktober 2020. Untuk makluman Yang Berhormat, sehingga 25 November 2020, sebanyak RM38.62 juta telah disalurkan kepada 308 buah SJKT. Daripada jumlah ini, sebanyak RM7.79 juta adalah untuk penyelenggaraan 130 buah SJKT berstatus sekolah kerajaan dan bakinya sebanyak RM30.83 juta lagi untuk penyelenggaraan 178 buah SJKT berstatus sekolah bantuan kerajaan.

Untuk soalan yang kedua, bolehkah dana penyelenggaraan ini diguna pakai untuk membeli peralatan-peralatan audio visual dan pembelajaran ICT di sekolah-sekolah yang memerlukan. Untuk makluman Ahli Yang Berhormat, seperti yang telah dinyatakan sebentar tadi, peruntukan penyelenggaraan ini hanya boleh digunakan untuk tujuan penyelenggaraan melibatkan aset tidak alih sahaja iaitu penyelenggaraan kecil bangunan dan infrastruktur. Contohnya, naik taraf atau ubah suai kecil, pendawaian elektrik dan pembasmian anai-anai. Oleh itu, peruntukan ini tidak boleh digunakan untuk membeli peralatan audio visual dan pembelajaran ICT di sekolah yang memerlukan.

Ketiga, apakah cadangan Kementerian Pendidikan untuk membelanjakan wang baki yang masih belum dibelanjakan setakat ini? Untuk makluman Yang Berhormat, penyaluran sumbangan bantuan kepada SJKT berstatus sekolah bantuan kerajaan akan dibuat sehingga 10 Disember 2020. Ini tertakluk kepada permohonan yang dikemukakan oleh SJKT yang berkenaan berserta dengan dokumen yang lengkap. Oleh itu, KPM hanya akan memberi pertimbangan terhadap SJKT yang mengemukakan permohonan berserta dokumen yang lengkap sehingga 10 Disember 2020.

Untuk soalan yang keempat, adakah kerajaan akan mengeluarkan peruntukan dana RM50 juta bagi tahun 2021 bagi tujuan penyelenggaraan SJKT. Jadi untuk makluman Yang Berhormat, semasa sesi libat urus bersama-sama Kementerian Kewangan, KPM telah memohon supaya diberi tanggungjawab untuk menentukan agihan peruntukan penyelenggaraan sekolah dan institusi pendidikan di bawah pengendalian KPM.

Ini bagi memastikan pengagihan dapat dibuat secara lebih menyeluruh dengan mengambil kira bilangan dan jenis sekolah. Sepertimana yang termaktub dalam Akta Pendidikan 1996, adalah menjadi tanggungjawab kerajaan untuk menyelenggara sepenuhnya sekolah kerajaan. Pada masa yang sama, kerajaan boleh memberi sumbangan bantuan kepada sekolah bantuan kerajaan.

Oleh itu, bagi memastikan agihan dibuat secara telus dan saksama berdasarkan keutamaan setiap sekolah, KPM telah menggunakan formula yang mengambil kira bilangan dan jenis sekolah, sama ada kategori sekolah kerajaan atau sekolah bantuan kerajaan dalam membuat agihan peruntukan bagi tahun 2021. Oleh itu, berdasarkan agihan yang telah dibuat bagi tahun 2021, siling peruntukan penyelenggaraan bagi SJKT berstatus sekolah kerajaan dan sekolah bantuan kerajaan adalah sebanyak RM29.98 juta.

■1210

Untuk makluman Ahli Yang Berhormat, KPM sedar bahawa terdapat jenis sekolah yang menerima peruntukan siling yang lebih rendah berbanding yang lain. Untuk itu, sebanyak RM30 juta lagi daripada RM750 juta peruntukan penyelenggaraan sekolah dan institusi pendidikan adalah dikhususkan bagi menampung mana-mana keperluan penyelenggaraan kritikal untuk jenis sekolah yang peruntukan silingnya adalah RM30 juta dan ke bawah.

Untuk soalan yang kelima, apakah mekanisme atau cadangan yang lebih mantap dalam membelanjakan RM50 juta supaya jumlah wang besar itu tidak dibazirkan dalam hal-hal yang tidak membantu proses pembelajaran dan pengajaran? Jadi untuk makluman Yang Berhormat, demi memastikan

kelangsungan proses pengajaran dan pembelajaran serta kemenjadian murid, KPM akan memastikan peruntukan disalurkan secara telus, saksama dan memberi impak yang optimum.

Oleh itu, bagi sekolah yang memerlukan peruntukan penyelenggaraan, permohonan perlu dikemukakan kepada KPM terlebih dahulu untuk diteliti serta dibuat penilaian sebelum peruntukan tersebut disalurkan. Walau bagaimanapun, jumlah peruntukan yang disalurkan tertakluk kepada tahap kerosakan dan kos pembaikan sebenar.

Terima kasih kepada Yang Berhormat dan terima kasih Tuan Yang di-Pertua.

Ketiadaan Bekalan Asas Utiliti di Kampung Tersusun Murni Jaya, Kulai

12.11 tgh.

Puan Teo Nie Ching [Kulai]: Terima kasih Tuan Yang di-Pertua dan terima kasih Yang Berhormat Timbalan Menteri.

Tuan Yang di-Pertua, ketiadaan bekalan asas utiliti seperti air, elektrik dan jaringan telekomunikasi di Kampung Tersusun Kampung Murni Jaya sehingga sekarang masih tiada jalan penyelesaian. Isu perlu diberi perhatian oleh pihak kerajaan kerana perkara asas ini merupakan kepentingan seharian masyarakat.

Terdapat 35 buah keluarga yang telah mendiami di kampung ini dan terpaksa menggunakan generator untuk mendapatkan bekalan elektrik. Namun seperti yang kita sedia maklum, menggunakan generator bergantung pada saiz dan tempoh masa generator digunakan. Penduduk kampung tersusun bukanlah mempunyai pendapatan yang kukuh dan terpaksa mengharungi peningkatan kos sara hidup serta kesan pandemik COVID-19 juga. Selain itu, pelajaran anak atau cucu mereka juga terganggu disebabkan masa mengulang kaji pelajaran terhad.

Berkaitan isu air pula. Permohonan bekalan air dan pemasangan meter telah dimajukan kepada pihak SAJ (Ranhill) malah saluran paip untuk bekalan air telah disiapkan sebelum Perintah Kawalan Pergerakan. Hakikatnya, penduduk kampung masih tidak dapat bekalan air sehinggalah hari ini.

Penggunaan jaringan telekomunikasi kawasan Kampung Murni Jaya amat lemah dan penduduk menghadapi kesukaran untuk berhubung menggunakan talian komunikasi. Pelbagai usaha penduduk kampung menggunakan pelbagai perkhidmatan syarikat telekomunikasi tetapi masih

menghadapi kesukaran. Kesselesaian hidup penduduk kampung ini perlu diambil perhatian kerana masalah ini telah berlarutan sehingga sekarang.

Soalan saya kepada Kementerian Kemajuan Luar Bandar ialah:

- (i) Apakah menyebabkan bekalan elektrik dan masih tidak dapat dibekalkan di Kampung Tersusun Murni Jaya oleh pihak kementerian?;
- (ii) Berapakah jumlah keseluruhan kos projek bagi bekalan elektrik dan air di Kampung Tersusun Murni Jaya?; dan
- (iii) Apakah menyebabkan jaringan telekomunikasi di Kampung Murni Jaya amat lemah sehingga memberi kesukaran kepada penduduk kampung dalam hal berhubung menggunakan telekomunikasi? Apakah solusi untuk isu ini?

Sekian, terima kasih. Terima kasih Tuan Yang di-Pertua.

12.14 tgh.

Timbalan Menteri Pembangunan Luar Bandar I [Dato' Sri Haji Abdul Rahman bin Mohamad]: *Bismillahi Rahmani Rahim. Assalamualaikum warahmatullahi wabarakatuh* dan salam sejahtera. Terima kasih Tuan Yang di-Pertua dan terima kasih kepada Yang Berhormat Kulai yang menanyakan soalan sebentar tadi.

Pertamanya saya merakamkan ucapan tahniah di atas keprihatinan Yang Berhormat bagi menyelesaikan permasalahan di dalam kawasan Yang Berhormat. Untuk makluman Yang Berhormat, Kementerian Pembangunan Luar Bandar sentiasa bekerjasama dengan kerajaan negeri terutamanya pihak berkuasa air negeri dan syarikat bekalan elektrik dalam usaha untuk menyediakan infrastruktur asas bekalan air dan elektrik kepada penduduk luar bandar.

Dalam hal ini, projek bekalan air luar bandar di Kampung Tersusun Murni Jaya, Kulai, Johor telah selesai dilaksanakan penyambungan daripada paip utama ke meter *stand* rumah penduduk pada tahun 2019 dengan kos berjumlah RM500 ribu. Skop pemasangan meter dan sambungan ke dalam rumah penduduk adalah di bawah tanggungjawab Syarikat Air Johor (SAJ) (Ranhill). Namun begitu, semakan terkini kementerian ini mengesahkan bahawa penduduk kampung telah menerima bekalan air. Justeru, masalah ketiadaan bekalan air ini telah selesai.

Kedua, bagi projek bekalan elektrik luar bandar pula. Kampung Tersusun Murni Jaya, Kulai merupakan salah satu daripada 18 buah kampung yang terlibat dalam Projek Bekalan Elektrik Luar Bandar (BELB) sambungan talian grid Semenanjung Malaysia tahun 2020, Reka dan Bina yang telah pun dimulakan pada 9 November 2020 dan dijadualkan siap sepenuhnya pada 8 November 2022. Ertinya dalam masa dua tahun dalam tempoh pelaksanaan tersebut. Pelaksanaan projek BELB di Kampung Tersusun Murni Jaya ini melibatkan sebanyak 52 buah rumah dengan anggaran kos pembinaan sebanyak RM1.65 juta.

Perkara tiga. Sebenarnya perkara mengenai jaringan telekomunikasi ini bukan di bawah penyeliaan Kementerian Pembangunan Luar Bandar tetapi perkara ini adalah di bawah penyeliaan Kementerian Komunikasi dan Multimedia. Namun begitu, kami telah mengambil inisiatif bagi mendapatkan maklumat dan izinkan saya membentangkan sedikit perkara ini.

Semakan oleh pihak Kementerian Komunikasi dan Multimedia mendapati terdapat beberapa buah menara komunikasi yang telah disediakan oleh pemberi perkhidmatan utama di kawasan berkenaan. Pihak KKMM mengambil maklum berkenaan dengan liputan yang kurang memuaskan di kawasan berkenaan dan akan membuat kajian yang lebih terperinci bagi mengenal pasti lokasi yang kurang mendapat liputan.

Sebagai langkah jangka pendek untuk mencari jalan penyelesaian, pihak KKMM melalui Suruhanjaya Komunikasi dan Multimedia Malaysia akan mengadakan perbincangan lanjut dengan pemberi perkhidmatan bagi menambah baik liputan di kawasan berkenaan. Selain itu, melalui Pelan Jalinan Digital Negara (JENDELA) yang telah diumumkan oleh Yang Amat Berhormat Perdana Menteri pada 29 Ogos 2020 yang lalu, terdapat perancangan untuk membina sebuah menara komunikasi di kawasan Murni Jaya yang dijangka akan siap pada suku kedua 2022 juga. Sekian, terima kasih.

Tuan Yang di-Pertua: Ahli-ahli Yang Berhormat semua, dengan itu tamatlah sesi ucapan di bawah Usul Berkenaan Perkara Tadbir Peraturan Mesyuarat 17 pada hari ini. Mesyuarat Kamar Khas hari ini ditangguhkan sehingga jam 12 tengah hari, hari Rabu 2 Disember 2020. Terima kasih semua. *Assalamualaikum warahmatullahi wabarakatuh.*

[Kamar Khas ditangguhkan pada pukul 12.18 tengah hari]